

Relatóriu Monitorizasaun Insidente Violénsia Eleitorál iha Eleisaun Prezidensiál 2017

Sistema Atensaun no Responde Sedu (AtReS)



Dokumentasaun NGO Belun, Kampaña no Eleisaun Prezidensiál, 20 Marsu 2017.

Dili, 20 Abril 2017
NGO Belun



Publikasaun ida ne'e konsege hala'o tanba hetan apoiu jenerozu husi Povu Amerikanu liu husi Ajénsia Estados Unidos ba Dezenvolvimentu Internasionál (USAID), Uniaun Europeia, UNDP, Governu RDTL, Estados Unidos Departamentu de Estadu no Organizasaun Internasionál ba Migrasaun (IOM) liu husi Award No. S-SJTIP-15-GR-1006). Opiniaun no kontektu husi konteúdu ne'e rasik responsabiliza husi NGO Belun no la nesesáriamente refleta vizaun husi USAID, Governu Estados Unidos, Estados Unidos Departamentu de Estadu, IOM, Uniaun Eropeia, UNDP, UNDA no Governu RDTL. Atu hetan informasaun barak liu tan kona-ba programa AtReS ka atu hare publikasaun seluk, favor vizita: <http://www.belun.tl>

Konteúdo:

Sumariu Ezekutivu	3
Konkluziun Prinsipál Sira.....	3
Nota Komparativu Sira	3
Rekomendasaun Xave	3
Introdusaun	3
Metodolojia	4
Dadus ho nia Análize.....	5
Sesaun 1: Insidente Sira Iha Tempu Kampaña Eleisaun Presidencial	7
Sesaun 2: Insidente Sira iha Loron Eleisaun Presidencial	7
Sesaun 3: Insidente Durante Aporamentu Kontajen Ba Votu.....	7
Análize Komparativu	8
Konkluziun.....	8
Rekomendasaun Sira	9
AtReS nia servisu iha fulan lima oin mai.....	9

Sumariu Ezekutivu

Objetivu relatóriu ne'e hatudu dadus insidente violénsia eleitorál husi eleisaun prezidensial iha dia 20 Marsu 2017, dadus ne'ebé sistema AtReS detekta liuhosi monitorizasaun hahú husi antes, durante no depois de eleisaun. Depois nune'e halo kompilasaun, analiza no hakerek relatóriu no identifika rekomendasaun profunda hodi halo submisaun ba Governu, liuliu ba instituisaun ne'ebé relevante hanesan – (Ministériu Administrasaun Estatal (MAE), Comisaun Nasionál Eleisaun (CNE) no Secretariado Técnico de Administração Eleitoral (STAE).

Konkluziun Prinsipál Sira

Bazeia ba rezultadu análise Belun nia monitorizasaun insidente violénsia eleitorál ne'ebé akontese hamutuk 41 iha periodu eleisaun maibé maioria insidente ladún sériu. Rezultadu análise ba potensibilidade konfliktu husi eleisaun Prezidensiál 20 Marsu 2017 korresponde duni Belun nia relatóriu rezultadu avaliasaun ba potensial violénsia eleitorál pasadu hatudu katak “sei la akontese potensial konfliktu ne'ebé boot maibé uitoan de'it”.

Nota Komparativu Sira

Insidente violénsia ne'ebé akontese iha eleisaun Prezidensiál 2012 mosu insidente hamutuk 82 kompara insidente ne'ebé akontese iha 2017 mosu insidente hamutuk 41, ne'e hatudu katak metade husi total insidente ne'ebé akontese iha eleisaun prezidensiál 2017 kompara ho eleisaun Prezidensiál iha tinan 2012 nian.

Rekomendasaun Xave

- Husu ba CNE atu aseguira partisipasaun no direitu sidadaun nian iha prosesu demokrátiku, inklui halo observasaun forte liután iha eleisaun parlamentár mai, partikulármente iha area rural;
- PNTL mantén nafatin lei no orden iha kampaña no prosesu eleisaun hodi garante estabilidade no liberdade iha eleisaun;
- Lider polítiku sira atu iha tempu kampaña ko'alia programa no vizaun, misaun partidu nia la'ós halo defamasaun ba malu hodi provoka insidente violénsia entre militante no husu ba lideransa partidu sira no ekipa susesu sira katak kapasidade atu maneja militante sai sasukat ida atu bele kaer ukun tanba insidente barak mosu tanba militante la kontrola an;
- Husu mós ba lideransa partidu polítiku sira atu halo kampaña karik lalika tula Massa apoiante militante sira husi fatin ka Munisípiu ida ba fatin ka Munisípiu seluk hodi antisipa insidente konfliktu no mós antisipa asidente tráfiku sira;

Introdusaun

Timor-Leste halo ona nia Eleisaun Prezidensiál ba dala haat husi tinan 2002; 2007; 2012 no agora ba eleisaun 2017. Objetivu relatóriu ne'e atu buka hatene area ne'ebé mak vulneravel bá konfliktu durante periodu eleisaun Prezidensiál iha dia 20 Marsu 2017 komesa hahú kampaña prezidensiál husi dia 3 to'o 17 Marsu 2017 ho insidente hamutuk 10; Loron eleisaun 20 Marsu 2017 no depois eleisaun iha oras 15:15 – 23:34 ho insidente hamutuk 16 ho loron 25 Marsu 2017 iha oras 22:20 iha insidente 15, atu nune'e Belun no stakeholder sira seluk bele hatene no halo atividade dame, nune'e mós bele konsidera responde rekomendasaun xave no jerál sira hodi bele halo prevensaun violénsia eleitorál iha eleisaun Parlamentár iha fulan Julu 2017 oin mai.

Bazeia ba rezultadu monitorizasaun ho sistema AtReS ho modelu uza tablet komputer konsege deteta insidente violénsia eleitorál ho total 41 iha Munisípiu 12 inklui Rejiaun Autonomia

Espesiál Oekusse Ambenu (RAEOA), iha Postu Administrativu 43. Ho dadus ne'e hatudu katak eleisaun ne'e bele dehan susesu tanba laiha insidente violénsia ne'ebé sériu. Kompara ho relatóriu husi 'Misaun Observasaun Eleitorál husi Uniaun Europeia; Observatório da Igreja Para os Assuntos Sociais (OIPAS), NGO La'ó Hamutuk nia relatóriu mós deteta katak prosesu tomak komesa hahú kampaña to'ó rezultadu ba eleisaun Prezidensiál 20 Marsu 2017 la'ó di'ak no hakmatek.¹

Metodolojia

NGO Belun ho nia sistema Atensaun no Responde Sedu (AtReS) halo monitorizasaun ba insidente violénsia foku liubá eleisaun Prezidensiál iha periodu 2017. Sistema monitorizasaun ne'ebé uza tablet computer husi Belun nia Coordenador Munisipiu hodi update ka haruka insidente direta ba iha Belun nia sistema online data Portal ne'ebé hetan dadus husi monitor AtReS hamutuk 86 (mane na'in 64 no fetu nain 22) husi Postu Administrativu hamutuk 43. Ba kada Postu Administrativu iha monitor na'in rua ne'ebé mak halo monitorizasaun ba insidente violénsia, tantu relasaun ho eleisaun no mós ba asuntu jerál konflitu sosiál sira seluseluk, nune'e mós tau matan ba mudansa situasaun iha aspetu ekonomia, sósiu-kulturál, polítiku no mós relasaun external.

Iha nivel Postu Administrativu, Monitor servisu hamutuk ho Coordenadór Munisipiu (KM), Rede Prevensaun no Responde Konflitu (RPRK) sira halo rekolla dadus insidente no halo verifikasaun depois haruka liuhosi tablet camputer sistema online data portal. Tuir mai ekipa jesor AtReS Belun Nasionál sei kompila, analiza no hakerek relatóriu ho rekomendasaun atu uza hodi halo advokasia ba parseiru dezenvolvimentu sira hotu iha Timor-Leste.

¹ 1). Deklarasaun Preliminariu Dahuluk 22 Marsu 2017 – Timor-Leste Organiza eleisaun prezidensiál ne'ebé la'ó ho di'ak no hakmatek husi Uniaun Europeia; 2). Konferénsia Imprensa Eleisaun Prezidensiál 2017 husi OIPAS no 3). Relatoriu Observasaun Ba Eleisaun Prezidensiál Periodu 2017-2022 husi NGO La'ó Hamutuk.

Dadus ho nia Análize

Bazeia ba rezultadu monitorizasaun Belun liu husi Sistema Atensaun no Responde Sedu (AtReS) ² ba insidente violénsia eleitorál ne'ebé akontese 'antes, durante no depois' votasaun iha eleisaun prezidensiál ne'ebé realiza ona iha dia 20 Marsu 2017 rejista insidente ho total 41.

Husi total insidente ne'e, uza forsa fiziku ho maneira asalta malu, tuda malu no estraga atributu partidu iha insidente 8, no restu envolve violénsia verbal hanesan istori malu, haksesuk malu no hakilar malu.

Husi insidente ho asaun fiziku 8 ne'e, insidente 5 akontese iha Dili, 3 akontese antes eleisaun iha tempu kampaña, insidente 2 iha suku Comoro, 1 tan iha suku Fatuhada Postu Administrativu Dom Aleixo. Insidente 2 akontese durante prosesu eleisaun, 1 akontese iha suku Villa Maumeta Atauro no 1 tan akontese iha suku Leotela Postu Administrativu Likisá.

Insidente 3 akontese depois de eleisaun: Insidente 2 mosu iha oras prosesu kontajen mak mosu iha suku Gricenfor – Na'in Feto iha 1 no insidente 1 tan mosu iha suku Letefoho Postu Administrativu Same - Manufahi. Ikus mai insidente 1 mosu depois de votasaun ka hasai rezultadu iha suku Debos Postu Administrativu Suai. Atu hatene liu bele haree tabela-a no klaru liu bele haree kronolójia insidente tuir mai ne'e:




Tabela-a: Insidente Violénsia liga ba asaun fizika

Munisipiu	Antes	Durante	Depois	Total
Manufahi			1	1
Covalima			1	1
Dili	3	1	1	5
Likisa		1		1
Total	3	2	3	8

Insidente 8 ne'ebé akontese ho asaun fiziku ho sériu mak hanesan:

1. Iha lora 03 Marsu 2017, maizumenus tuku 06.00 lokraik akontese militante no apoiante husi kandidatu presidente repúblika periodu 2017 – 2022 envolve konfrontu iha Bairru Rai Kotu, Aldeia Terra Santa, Suku Comoro, Postu Administrativu Dom Aleixo, Munisipiu Dili. Insidente ne'e akontese bainhira militante no apoiante husi kandidatu presidente repúblika ida fila husi kampaña iha Munisipiu Ermera no to'o iha area Tasi tolu mosu provokasaun no sira envolve iha konfrontu. Iha akontesimentu ne'e sira tenta sunu motor no duni malu hodi halo ema barak ta'uk no pániku. Kauza husi akontesimentu ne'e, resulta mós uma balun nia vidru rahun. Polísia to'o kedas iha fatin akontesimentu no hodi halo intervensaun, no kazu ne'e iha ona investigasaun nia laran.
2. Iha lora 17 Marsu 2017, maizumenus tuku 07.00 kalan, iha Aldeia Bee Horis, Suku Fatuhada, Postu Administrativu Dom Aleixo, Munisipiu Dili akontese apoiante sira husi militante kandidatura presidente RDTL husi parte rua tuda malu. Insidente ne'e akontese bainhira fila husi kampaña iha Tasi Tolu halo karavana hodi provoka malu no hatún malu ikus mai mosu tuda malu entre sira, laiha kanek iha insidente tanba intervensaun lalais husi Polísia sira no consege hafahe sira.
3. Iha lora 12 Marsu 2017, maizumenus tuku 05.30 lokraik akontese labarik sira tuda malu iha Aldeia Baya Leste, Suku Comoro, Postu Administrativu Dom Aleixo, Munisipiu Dili. Insidente ne'e akontese tanba sira hatún malu liga ba partidu polítiku, nune'e sira

² Sistema Atensaun no Responde Sedu (AtReS) kobre iha Postu Administrativu 43 (husi total 65), iha Suku 275 (husi total 442) iha Munisipiu 12 no Rejiaun Autonomia Espesial Oekusi Ambenu.

tuda malu. Laiha impaktu ruma husi akontesimentu ne'e tanba hetan intervensaun lalais husi Komuidade, Membru Konsellu Suku no Polísia, nune'e labarik hirak ne'e halai fahe malu tiha.

4. Iha loron 20 Marsu 2017, mais menus oras 12:00 meiodia, iha Aldeia Eclae suku Vila Maumeta, Postu Administrativu Atauro, Munisipiu Dili akontese maun alin fakar tinta vota ba malu. Insidente ne'e akontese tanba problema privadu entre maun alin Nain rua kleur ona. Polísia no Polling staff balun maka halo intervensaun maibé parte rua la simu malu.
5. Iha loron 20 Marsu 2017, maizumenus tuku 05.00 loraik akontese pesoál PNTL baku joven na'in tolu iha Eskola Primária Xina, Aldeia Grilos, Suku Gricenfor, Postu Administrativu Na'in Feto, Munisipiu Dili. Insidente ne'e akontese bainhira prosesu kontajen votu la'o hela, maibé joven na'in tolu ne'e hemu tua no lanu hafoin halo barullu sira nia motor (gas motor) no sira hakilar radikál. Polísia halo kedas intervensaun hodi hapara no baku joven hirak ne'e hodi haruka fila ba uma.
6. Iha loron 20 Marsu 2017, maizumenus tuku 10.00 dadeer akontese militante sira husi partidu ida ba halo asaltu no halo ameasa ba komuidade iha Aldeia Lepa, Suku Leotela, Postu Administrativu Likisá, Munisipiu Likisá. Iha akontesimentu ne'e, militante partidu ida mak ba komuidade (militante partidu seluk) nia uma ho halo asaltu no halo ameasa ba komuidade ne'e. Sira mós lees atributu partidu nian ne'ebé taka iha komuidade ne'e nia uma. Kazu ne'e hato'o ona ba Polísia no submete ona ba investigasaun.
7. Iha loron 20 Marsu 2017, maizumenus tuku 05.15 lokraik, iha Aldeia Rialau, Suku Letefoho, Postu Administrativu Same, Munisipiu Manufahi akontese joven na'in rua ho motor xoke sinais trázitu ne'ebé tau iha sentru apuramentu munisipiu hafoin sira na'in rua halai liu. Hafoin xoke tiha sinais trázitu ne'e, joven na'in rua ne'ebé refere lakohi para no sira na'in rua halai liu, ho ida ne'e mak polísia duni tuir to'o sira nia uma no la konsege kaer, entaun polísia kaptura fali joven na'in rua ne'e ida nia aman no lori ba detain iha sela ho hanoin joven na'in rua ne'e mak entrega an.
8. Iha loron 25 Marsu 2017, maizumenus tuku 10.30 kalan akontese mane ida baku nia alin iha Aldeia Tabako Lot, Suku Debos, Postu Administrativu Suai, Munisipiu Covalima. Insidente ne'e komesa ho sira hemu tua hamutuk hafoin lanu no sira kontinua ho diskute malu kona-ba partidu polítiku, ho ida ne'e mak mosu diferenza ideia nune'e maun la simu hodi baku nia alin. Família no kolega mak halo intervensaun ba problema ne'e no sira rezolve ona.

Dadus hatudu katak, maioria insidente hirak ne'e akontese tanba:

1. Militante halo provokasaun ba malu iha tempu kampaña no prosesu kontajen de votu, ne'ebé akontese insidente violénsia 19 (ezemplu: ho hatún malu, hakilar malu to'o balun tuda malu no baku malu);
2. votante no ofisiál iha sentru votasaun seidak komprende ho di'ak regra no prosesu eleisaun, akontese insidente 8, (ezemplu: ofisiál sentru votasaun halo impedimentu ba membru F-FDTL (hatais sivíl) ne'ebé mai tuir votasaun);
3. votante balun hatene regra eleisaun maibé lakohi halo tuir duni regra eleisaun nian, akontese insidente 4 (ezemplu: hasai foto iha kabina laran ba boletin da votu ne'ebé tu'u ona) no mai vota ho uza atributu partidu nian);
4. deskonfia irregularidade, akontese dala 4, (ezemplu: hanesan boletin da votu iha riska no vistu ona antes votante tu'u, troka dala 3 tuituir malu maibé hanesan de'it, desizaun votu nulu deskonfia diskriminasaun);

5. liña forma naruk liu, lakon pasiénsia hamosu hirus malu, akontese insidente 4;
6. votante la hatene tempu votasaun no fatin votasaun, akontese dala 2, Ezemplu: votante forma tiha ona liña naruk no too tuku 03.00 lokraik tenke para entaun hamosu haksasuk malu entre votante ho ofisiais sentru votasaun.

Ho diagrama koluna-1 ne'e bele define katak husi nivel Munisípiu ne'e insidente aas liu tuituir malu mak: Nivel primeiru aas liu akontese iha Dili ho número insidente hamutuk 13, pozisaun segundu mak Likisá ho número insidente hamutuk 8 no parte terseiru mak Baukau ho insidente hamutuk 4. Husi nivel Munisípiu ne'e insidente menus liu tolu tuituir malu mak: Nivel primeiru menus liu akontese iha Aileu, Ermera, Lautem, Manatuto no Oekusse ho insidente ida-idak ba kada Munisípiu, pozisaun segundu mak Bobonaro ho insidente hamutuk 2 no parte terseiru mak Munisípiu Ainaru, Covalima no Manufahi ho insidente hamutuk 3. Interessante tebes tanba Munisípiu Vikeké durante istória ba eleisaun ba periodu dala tolu ona foin mak hatudu katak laiha insidente violénsia relasiona ho eleisaun prezidensiál.

Tuir mai insidente violénsia iha nivel Postu Administrativu mak iha Dom Aleixo iha 8; Baukau Vila iha 4; Bazartete, Likisa Vila no Same iha 3. Zumalai, Vera Cruz, Pante Makasar, Lospalos, Laclo, Ermera, Cristo Rei, Atauro, Ainaro Vila no Aileu Vila mosu insidente ida-idak. Tuir mai iha Suai, Nain Feto, Maubise, Maubara no Atabae mosu insidente 2 ba kada Postu

Sesaun 1: Insidente Sira Iha Tempu Kampaña Eleisaun Prezidensiál

Bazeia ba tabela-1 hatudu katak insidente ne'ebé akontese durante tempu kampaña ka antes eleisaun husi loraun Sesta Feira dia 3 Marsu hahú husi oras 09:00 to'o Sesta Feira dia 17 Marsu 2017, remata iha oras 19:00 hamutuk número 10, akontese barak liu iha Munisípiu Dili ho número insidente 4, tuir mai Likisá ho 2 no Ainaru, Baukau, Ermera no Oekusse mosu ida-idak. Munisípiu ne'ebé naran la inklui iha tabela ne'e hatudu laiha insidente ne'ebé mosu iha tempu ne'ebá.

Sesaun 2: Insidente Sira iha Loraun Eleisaun Prezidensiál

Bazeia ba tabela-2 hatudu katak insidente ne'ebé akontese iha tempu eleisaun iha dia 20 Marsu 2017, husi oras 07:00 dader to'o 15:00 loraik iha número insidente ho total 16, barak liu akontese iha Dili no Likisá ho número insidente ne'ebé hanesan ho 4. Husi insidente 16 ne'e, insidente 2 mak asaun fíziku no ida-idak mosu iha Dili no Likisá no insidente 14 mak ho tipu haksasuk malu (ko'alia verbal) no akontese iha fatin sentru votasaun mak barak liu

Sesaun 3: Insidente Durante Aporamentu Kontajen Ba Votu

Haree husi tabela-3 fó indikasaun katak insidente ne'ebé akontese depois de eleisaun, liu utoan oras 15:00 ba leten to'o oras 24:00 mosu insidente hamutuk 14. Iha loraun 21 to'o 24 Marsu laiha insidente no mosu fali insidente 1 iha

Tabela-1: Tempu Kampaña, dia 3 - 17 Marsu 2017, husi oras 0:00 to'o 24:00

Munisípiu	Insidente
Dili	4
Liquica	2
Ainaro	1
Baukau	1
Ermera	1
Oekusi	1
Total Jerál	10

Tabela-2: Iha tempu votasaun, 20 Marsu 2017 husi oras 7:00 - 15:00

Munisípiu	Insidente
Dili	4
Liquica	4
Baukau	2
Manufahi	2
Aileu	1
Bobonaro	1
Covalima	1
Manatuto	1
Total Jerál	16

Tabela-3: Depois de Votasaun

Munisípiu	20 Marsu 2017 husi Oras 15:15 - 23:34	25 Marsu 2017 iha Oras 22:30	Total Jerál
	Insidente	Insidente	Insidente
Dili	5		5
Ainaro	2		2
Liquica	2		2
Baukau	1		1
Bobonaro	1		1
Covalima	1	1	2
Lautem	1		1
Manufahi	1		1
Total Jerál	14	1	15

loron 25 Marsu 2017 iha suku Debo, Suai Covalima, ho ida ne'e hatudu katak totál insidente ne'ebé akontese depois loron eleisaun hamutuk 15. Fortifika de'it katak insidente 14 ne'e kuaze iha prosesu kontajen.

Análize Komparativu

Insidente violénsia eleitorál ne'ebé akontese iha eleisaun Prezidensiál 9 Marsu 2012 no 16 Abril 2012 mosu insidente ho totál 82 (primeira volta iha 34 no segundu volta iha 48) kompara insidente ne'ebé akontese iha eleisaun Prezidensiál 20 Marsu 2017 mosu insidente hamutuk 41, ne'e hatudu katak metade husi totál insidente ne'ebé akontese iha eleisaun prezidensiál 2017 kompara ho eleisaun Prezidensiál iha 2012 nian. Ne'e hatudu katak mudansa ne'ebé signifkante duni, maske iha eleisaun ida ne'e laiha prosesu ba segundu volta.

Konkluzau

Bazeia ba rezultadu análize Belun ho insidente ne'ebé akontese hamutuk 41, rezultadu análize ba potensilidade konflitu husi eleisaun Prezidensiál loron 20 Marsu 2017 korresponde duni Belun nia relatóriu rezultadu avaliasaun ba potensial violénsia eleitorál pasadu hatudu katak "sei la akontese potensial konflitu ne'ebé boot maibé utoan de'it". Indikasaun ne'e mós nota hanesan husi relatóriu "Preliminariu Dahuluk husi Uniaun Europeia, katak Timor-Leste organiza eleisaun prezidensiál ne'ebé la'ó ho di'ak no hakmatek"³.

Munisípiu ne'ebé mak insidente aas liu tuituir malu mak: Nivel primeiru aas liu akontese iha Dili ho número insidente hamutuk 13, pozisaun segundu mak Likisá ho número insidente hamutuk 8 no parte terseiru mak Baukau ho número insidente hamutuk 4. Husi Munisípiu ne'ebé mak insidente menus liu tolu tuituir malu mak: Nivel primeiru menus liu akontese iha Aileu, Ermera, Lautein, Manatuto no Oekusi ho insidente ida-idak ba kada Munisípiu, pozisaun segundu mak Bobonaro ho insidente hamutuk 2 no parte terseiru mak Munisípiu Ainaru, Covalima no Manufahi ho insidente hamutuk 3. Interessante tebes tanba Munisípiu Vikeké durante istória ba eleisaun ba periodu dala tolu ona foin mak hatudu katak laiha insidente violénsia relasiona ho eleisaun prezidensiál.

Bazeia ba rezultadu análize ho razaun tanbasá Munisípiu Dili mosu insidente ne'e aas liu duké kompara ho Munisípiu sira seluk. Dadus hatudu katak movimentu militante entre kandidatu presidente sira ba periodu 2017 – 2022 iha Dili nu'udar kapitál maka'as liu. Liuliu ba apoiante joven sira ne'ebé gosta halo barullu uza motor hodi konvoi iha sidade. Parte seluk nota momoos katak lori massa apoiante barak ba halo kampaña iha fatin seluk husi (Dili ba Ermera), ezemplu insidente boot akontese iha rai kotu Comoro, iha indikasaun forte hodi hatudu chama atensaun husi apoiante sira husi kandidatu presidente sira seluk atu komesa provoka malu.

Insidente sira ne'e akontese tanba ho entre militante ka apoiante halo provokasaun ba malu iha tempu kampaña no prosesu kontajen de votu ho hatún malu, hakilar malu to'o balun tuda malu no baku malu. Parte seluk mak votante no ofisiál iha sentru votasaun seidak komprende ho di'ak regra no prosesu eleisaun. Ida seluk mak votante balun hatene regra eleisaun maibé lakohi halo tuir duni regra eleisaun nian no mai vota ho uza atributu partidu nian). Indikasaun konflitu ikus mak votante la hatene tempu votasaun no fatin votasaun.

Ne'e hatudu katak prosesu festa demokrasia iha Timor-Leste komesa hatudu pozitivu kompara ho nasaun post konflitu sira seluseluk iha mundu. Tuir padraun internasionál katak bainhira rezultadu eleisaun jerál (Prezidensiál no Parlamentár) mak iha indikasaun bulletin de votu sira ne'ebé hatudu inválidu maka liu tiha 2% husi totál votu sira, ne'e indika katak eleisaun la la'ó

³ Deklarasaun Preliminariu Dahuluk 22 Marsu 2017, husi 'Misaun Observasaun Eleitorál husi Uniaun Europeia', Timor-Leste, Eleisaun Prezidensial no Lejislativa, 2017.

ho susesu, maibé realidade hatudu foin daudauk iha eleisaun Prezidensiál 20 Marsu 2017 hatudu katak menus husi 2%, ne'e sinál di'ak katak eleisaun iha Timor-Leste la'o ho susesu boot.

Rekomendasaun Sira

Rekomendasaun no Asaun Imediatu Antes Eleisaun Parlamentár:

Eleisaun Parlamentár ne'ebé kompete maizumenus husi 31 partidu polítiku, sei karik hamosu poténsia konflitu. Tanba nee, Belun rekomennda:

1. Governu liu husi STAE hodi haree fila fali númeru sentru votasaun tanba insidente balun mosu tanba votante forma ona liña naruk maibé too ikus labele vota tanba oras hotu ona;
2. Governu liu husi STAE ho nia parseiru dezenvolvimentu, sosiedade sivil, ONG sira tenke investe duni ba halo sosializasaun prosesu eleisaun hodi redús insidente ne'ebé mosu tanba votante la komprende prosesu eleisaun too ikus hamosu insidente violénsia iha sentru votasaun;
3. Governu liu husi Komisaun Nasionál Eleisaun (CNE) ho nia parseiru dezenvolvimentu hodi investe no tau prioridade ba edukasaun sívika ba comunidade votante sira hodi kompriende ho di'ak sistema demokrasia iha sistema eleisaun hodi redús insidente mosu tanba provokasaun ba malu;
4. Lider polítiku sira atu iha tempu kampaña ko'alia programa no vizaun, misaun partidu nia la'ós halo defamasaun ba malu hodi provoka insidente violénsia entre militante;
5. Husu mós ba lideransa partidu polítiku sira atu halo kampaña karik lalika tula Massa apoiante militante sira husi fatin ka Munisípiu ida ba fatin ka Munisípiu seluk hodi antisipa insidente konflitu no mós antisipa asidente tráfiku sira;
6. Husu ba CNE atu asegura partisipasaun no direitu sidadaun nian iha prosesu demokrátiku, inklui halo observasaun forte liután iha eleisaun parlamentár mai, partikulármente iha area rurál;
7. PNTL mantén nafatin lei no orden iha kampaña no prosesu eleisaun hodi garante estabilidade no liberdade iha eleisaun;
8. Husu ba Polísia Nasionál Timor-Leste (PNTL):
 - a. Husu nafatin ba Polísia sira atu hatudu atendentu imparsiál ba asegura seguransa iha prosesu tomak eleisaun liuliu iha eventu kampaña husi partidu polítiku hotu-hotu entre tantu iha nafatin direitu atu tuir votasaun hodi hili;
 - b. Reforsa liña koordinasaun ho CNE no STAE ba oráriu kampaña no garantia no asegura seguransa ba urna de votu iha prosesu apuramentu.
11. Husu ba populasau Timor-Leste atu pasiénsia no simu rezultadu eleisaun, no karik akontese irregularidade ruma bele apresenta ba parte kompetente hanesan CNE.

AtReS nia servisu iha fulan lima oin mai

Sistema Atensaun no Responde Sedu (AtReS) oin mai, observadór ne'ebé mai husi Monitorizador AtReS⁴ mak atu halo monitorizasaun iha nivel Postu Administrativu to'o aldeia kontinua tau matan ba eleisaun Parlamentár ne'ebé sei halo iha fulan Jullu 2017 oin mai. Observasaun ne'e sei foku liu ba insidente violénsia eleitorál nian. Depois Belun halo kompila dados insidente no analiza no hakerek relatóriu hodi halo submisaun ba parseiru dezenvolvimentu sira, liuliu ba parte Governu nivel foti desizaun. Submisaun relatóriu ho nia rekomendasaun ne'e sei levanta liuhosi semináriu nasional. Dalan seluk mak Belun sei halo advokasia direta ba parte instituisaun ne'ebé relevante hanesan Ministériu Administrasaun Estatal (MAE) ho nia liña kooperasaun ho CNE no STAE.

⁴ Bele haree ba parte metodolojia sistema Atensaun no Responde Sedu (AtReS) iha parte seluk relatóriu ne'e.